


丁鶴年集
附錄
校讞





丁鶴年集

附錄校譌

J
17.8
12280

丁鶴年撰
戴稷編次

編主五雲王

編初成集書叢

集 年 鶴 丁

譌校錄附

中華民國二十六年六月初版

撰 者 丁 鶴 年

編 次 者 戴 稷

發 行 人 王 雲 五

印 刷 所 商 務 印 書 館

發 行 所 商 務 印 書 館

上海及各埠

上海河南路

上海河南路

朱

◆E九五八

鶴年先生詩集序

昔者成周之興肇自西北。西北之詩見之於國風者。僅自豳秦而止。豳秦之外。王化之所不及。民俗之所不通。固不得繫之列國矣。我元受命。亦由西北而興。西北諸國。若回回吐蕃。康里畏吾兒也。里可溫。唐兀之屬。往往率先臣順。奉職稱藩。其沐浴休光。露被寵澤。與京國內臣無少異。積之既久。文軌日同。而子若孫。遂皆舍弓馬而事詩書。至其以詩名世。則貫公雲石。馬公伯庸。薩公天錫。余公廷心。其人也。論者以馬公之詩似商隱。貫公薩公之詩似長吉。而余公之詩。則與陰鏗何遜齊驅而並駕。他如高公彥敬。獲公子山。達公兼善。雅公正卿。聶公古相。幹公克莊。魯公至道。三公廷圭輩。亦皆清新俊拔。成一家言。此數公者。皆居西北之遠國。其去豳秦。蓋不知其幾千萬里。而其爲詩。乃有中國古作者之遺風。亦足以見我朝王化之大行。民俗之不變。雖成周之盛莫及也。鶴年亦西北人。其視數公差後起家。世以勳業著。而鶴年兄弟俱業儒。伯氏之登進士第者三人。鶴年乃泊然無意於仕進。遭時兵亂。逃隱海上。邈不與世接。凡幽憂憤悶悲哀痛苦之情。一於詩焉發之。觀其古體歌行諸作。要皆清麗可喜。而注意之深。用工之至。尤在於五七言律。但一篇之作。一語之出。皆所以寓夫憂國愛君之心。愍亂思治之意。讀之使人感情激烈。不知涕泗之橫流也。蓋其措辭命意。多出杜子美。而音節格調。則又兼得我朝諸閣老之所長。故其入人之深。感人之妙。有非它詩人之所可及。嗚呼。若鶴年者。豈向數公之流亞歟。然數公之在當時。皆達而在上者。

也。世之士子。孰不膾炙其言辭。鶴年遭夫氣運之適衰。方獨退處遐陬。而爲所謂窮者之詩。以自慰。其能知夫注意之深。用工之至者。幾何人哉。知與不知。在鶴年未足輕重。第以祖宗涵煦百年之久。致使遐方絕域之詩。俱得繫之天子之國。而鶴年之所以著明王化民俗之盛。以與數公並傳於斯世者。將遂泯無聞矣。不亦重可悲夫。故取其吟藁若干卷。序而傳之。以俟世之知鶴年者。相與諷詠焉耳。鶴年之清節峻行。已別有傳。茲不著。至正甲午秋。九靈山人金華戴良序。

丁鶴年集卷一

元 丁鶴年撰

門人四明戴稷編次

海巢集

海濱避兵時所作

五言古詩

採蓮曲

採蓮復採蓮。仍唱採蓮曲。若欲知苦心。須食蓮中肉。
採蓮復採蓮。踟躕一何久。不愁花妒容。維恐刺傷手。
採蓮復採蓮。藕亦不可棄。中有不斷絲。似妾纏絲意。
採蓮復採蓮。爭如採荷好。花謝葉獨存。團圓以終老。
採蓮復採蓮。湖水清且深。徒能照妾面。不能照妾心。
採蓮復採蓮。下有孤鴛鴦。秋花不結實。夜夜守空房。

又

蓮開花覆水。蓮謝藕在泥。不學青萍葉。隨波東復西。
朝採並蒂蓮。暮館同心結。不學綠楊枝。含嚙送離別。

又

蓮舟何處來。同聚南湖口。郎憐波上花。妾愛泥中藕。
藕有清白節。花有豔冶容。郎心異妾心。三歎掩歸篷。

長嘯篇

惟遠度可量。惟暗燭可照。丈夫窮達際。安可以逆料。區區井觀天。擾擾管窺豹。衆論徒沸騰。誰能領其要。
韓信出跨下。市井皆哄笑。范睢置廁中。醉客更相溺。一朝佐秦漢。將相無同調。聲名六合馳。事業九天耀。
平生怨與恩。歷歷加顯報。以馬飼故人。以尉乞惡少。是非姑置之。獨立發長嘯。

輓倪仲權處士

維鄞有高士。乃居城北門。伯叔列茅土。弟昆羅搢紳。先生視富貴。蔑若行空雲。蕭然坐一室。詩書日討論。
忠信化閭里。孝友敦親姻。用茲以歿世。人亡道彌尊。我昔客東海。託交見天真。拳拳金石義。竊竊骨肉恩。
豈意隔生死。相思勞夢魂。尙憐靈鳳毛。符彩備五珍。每過話疇昔。相對淚沾巾。我輩匪兒女。所感在斯文。

悼亡

別時如玉人。歸來死生隔。日暮泣孤墳。音容杳難得。惟餘墳上草。猶帶羅惹色。

湖上曲二首

鴛鴦湖中飛。還向湖中落。不比薄情人。天涯并海角。
汀鷺曠湖波。清白兩無愧。立盡風雨寒。頗爲口腹累。

七言古詩

送月侍郎定江制賦稅還大都代杭城父老作

戈甲三邊靜。車書四海同。時平尙文治。策士明光宮。龍沙公子清且美。玉立芙蓉照秋水。前席才名賈誼賢。出關氣概終軍偉。恭捧帝符臨下方。卿雲五色分天章。星輅小駐武林驛。炎海六月生清涼。宣朝廷德意。問閭閻疾苦。遊民亦占籍。編戶悉按堵。力役均平賦。歛輕去者謳歌來鼓舞。觀風采謠。乃使之職。任賢使能。惟帝之德。目擊盛事。豈容緘默。乃歌曰。生逢舜日當堯天。經營內外皆英賢。八十衰翁百無補。茅櫟擊壤歌豐年。

題餘姚葉敬常州判海隄卷補先兄太守遺闕

陰霓夜吼風雨急。坤維震蕩玄溟立。桑田變海人爲魚。葉侯訴天天爲泣。侯奉天罰誅妖覓。下平水土安羣黎。嶙峋老骨不肯朽。化作姚江捍海隄。海隄蜿蜒如削壁。橫截狂瀾三萬尺。隄內耕桑隄外漁。民物欣欣始生息。潮頭月落啼早鴉。柴門半啓臨瀕沙。柳根白舫賣魚市。花底青帘沽酒家。花柳村村各按堵。世變侯仙條成古。侯雖已矣遺愛存。時聽叢祠咽簫鼓。人生何必九鼎榮。廟食貴有千載名。君不聞一杯河水決瓠子。沉馬親勤漢皇祀。又不聞一帶江波泛蜀都。刻犀厭勝秦人愚。江平河塞世猶駭。何況堂堂障滄海。論功不啻濟川才。砥柱南東千萬載。嗚呼。只今四海俱橫流。平地風波沉九州。蒼生引領望援溺。州縣有官非葉侯。州縣有官非葉侯。禦災誰復憂民憂。

贈戴原正

戴生眼如電。讀書夜忘眠。清晨盥櫛罷。起居慈母前。母身康寧子心喜。讀書還向書帷裏。綴文調膳秋復春。鳳凰符彩騶虞仁。天心一回四海平。治明堂掄材。清廟需器。棟梁瑚連寧汝棄。

離鸞篇爲四明孟善祖母祝節婦賦

孤鳳病且死。聘鸞以爲偶。引頸鳴鳴託其後。鸞對以臆肯以首。惡鳥啄其雛。飄風撼其巢。伏育補葺。鸞不辭勞。雖日以長能反哺。巢日以廣多牖戶。天錫壽考既和且平。每一對鏡猶復悲鳴。始終德義俱無愧。乃知鸞鳳所以爲世瑞。

胡節婦詩

一自失良人。年年不見春。常時折花處。青苔滿行路。卽今垂老百事非。篋中惟有嫁時衣。姑終養。子成立。望夫差勝山頭石。

樂節婦詩

荼蓼未爲苦。薑桂未爲辛。纍纍辛苦者。無若未亡人。欲隨世苟活。生則同室死同櫛。欲殉夫並殂。阿婆方老兒方孤。朝養姑。暮教子。泉下良人猶不死。

五言律詩

送四兄往杭後寄

臨別強言笑。獨歸情轉哀。離魂悽欲斷。孤抱鬱難開。太守隄邊柳。徵君宅畔梅。過逢如見憶。煩寄一枝來。
逃禪室臥病東諸禪侶

高秋多病客。古寺寄黃昏。野迥常疑虎。天寒早閉門。離愁燈下影。鄉淚枕邊痕。賴有諸禪侶。情親似弟昆。
汨汨

汨汨在塵埃。羈懷不暫開。病將顏玉去。愁送鬢絲來。招隱慙高蹈。扶顛乏大才。行藏成兩失。回首有餘哀。

次烏繼善先生見寄韵

扶杖日行吟。悠然太古心。風雲遺壯氣。山水效清音。大雅消沉久。斯文感慨深。幸瞻喬梓在。奕葉盡成陰。

輓柴吏目

奕世蓮花幕。人稱漢吏師。都緣參贊重。頗覺轉遷遲。雅論非三語。清聲是四知。猶餘前案牘。長作後箴規。

輓定海章處士處士晚年好道

流年驚逝水。世事逐飄風。卜築鄰蓬島。移家類葛洪。丹還金鼎伏。劍解玉棺空。惟有松壇月。通宵貫彩虹。

輓修竹處士

種竹人何在。鄉鄰久未忘。冰霜餘節操。雲錦見文章。散帙依朝爽。移樽坐夕涼。兒孫皆玉立。尤足繼遺芳。

五言排律

太守兄階下。新竹數竿秀。色鬱然可愛。索予賦詩敬製長律一十八韵

楚楚新移竹。脩脩已出林。渭川元接葉。淇水本聯陰。既忝軒墀重。應蒙雨露深。芝蘭方並植。荆棘敢相侵。有荷栽培力。無慙變化心。長身龍夭矯。密羽翠蕭森。委砌風飄錦。篩庭日布金。奇材仲連箭。雅韻伯牙琴。歎乃歌頻度。平安問每臨。風雲今自飽。冰雪舊能任。豈獨松梅友。仍多草木欽。琅玕擊使節。玳瑁合明簪。直可扶衰老。貞堪載古今。釣鼈期大用。引鳳壓羣音。詞客題詩到。幽人載酒尋。煙旌朝冉冉。月纓夜沉沉。展席臨秋水。鉤簾對夕岑。清風驅酷暑。一爲豁煩襟。

七言律詩

奇胡敬文縣尹胡遂初真人海上漕舟北還得應奉兄家書云湖廣親舊兵後僅餘二公感而賦詩以寄

湖北衣冠竊士林。十年兵革盡消沉。岷岡火後餘雙壁。錦里書回抵萬金。鳧舄趨朝天闕近。霓裳度曲月宮深。誰知海上垂綸者。去國長懸萬里心。

奉寄表兄白留守兼呈楊廉使

白髮先朝舊從臣。懸車徧看五湖春。養恬高節矜持重。優老濃恩拜奉頻。每有緇黃談幻化。可無朱紫問經綸。座中不遇楊開府。肯把平生對客陳。

送進士都堅不花出宰三山

龍沙公子龍頭客。綿繡胸襟玉雪顏。一日蜚英驚四海。九天承寵宰三山。花前封印青春醉。槐下鳴琴白

晝閒守令近民勤。聖念早須報政五雲間。

觀太守兄昌國勸農

東臯風日媚新晴。太守躬耕曉出城。島嶼雙旌穿柳過。蕭蕭五馬踏花行。扶藜父老陪諮訪。騎竹兒童主送迎。豈意兵荒南北徧。化行滄海獨昇平。

頌庥

腐儒避地海東偏。鳳庥頒春下九天。載拜帝堯新正朔。永懷神禹舊山川。廟堂久託君臣契。藩閫兼操將相權。只在忠良勤翊戴。萬方行覩至元年。

勉戴玄學

才名籍甚冠時髦。愛爾青年氣獨豪。千里共誇騏驥足。九苞爭覩鳳凰毛。月中把桂雲生履。天上看花日暎袍。宦達每由稽古力。夜窗燈火莫辭勞。

贈陳章甫

少年仗劍遊京國。豪氣崢嶸壓五陵。柳綠御溝春飲馬。草黃上苑曉呼鷹。日邊冠蓋人人識。雪後舟航處處乘。白首歸來尋舊隱。高談驚座羨君能。

寄西湖林一貞先生

錦繡湖山世絕稀。東風不放賞心違。芙蓉楊柳臨清淺。佛剎仙宮繞翠微。畫舫載春天上坐。紫駟馱醉月

中歸高情獨有林和靖。門掩晴空看鶴飛。

鄞江館送潘允章歸天台省

從師久客鄞江館。重憶庭闈閒起居。五彩早成萊子服。一經今授伏生書。落花芳草春停騎。斜日孤雲暮倚闌。暫爾南歸仍北上。萬言敷奏玉階除。

次韵奉答張撫軍二首

先公昔鎮西南日。幾拜殊恩出御筵。桃李門牆賓客盛。芝蘭庭砌子孫賢。百年遺愛齊民服。一代鴻勳信史編。最是撫軍能接武。挑燈夜讀十三篇。

堂堂雄略靖三邊。壘壘清談動四筵。夜月轅門嚴士卒。春風幕府集才賢。詩宗李杜元無敵。書法孫吳每自編。白首栖栖江海客。遠煩馳寄錦雲篇。

寄張廷言

千里關河阻重兵。兩煩書札見深情。故人我久知張祿。處士時多忌禰衡。閱世正當思豹變。出關何必待雞鳴。莫嗟才大難爲用。天運行將返治平。

送人歸故園

故園聞道已休兵。客裏那堪送客行。老去別懷殊作惡。亂餘歸計倍關情。孤村月落羣雞叫。絕塞天清一鴈橫。到日所親如見問。浪遊江海負平生。

次韵奉答東軒居士

珠玉新詩照士林。長城寧畏短兵侵。春雲有態時時變。秋水無痕岸岸深。洛下才名推獨步。越中山水喜重臨。別來歲晚偏相憶。誰折梅花慰渴心。

丙午十一月二十四日夜夢回書事

抱病經時不出門。存亡一一念諸昆。兵戈隨處斷消息。風雨終宵勞夢魂。竹下題詩雲起硯。花前度曲月當樽。每因舊事增新感。獨對寒燈拭淚痕。

海巢

海上巢居海若降。三山眼底小如缸。已攀若木爲華表。更立樽桑作翠幢。蛟室夜光晴燭戶。蜃樓秋影冷涵窗。鶴鷄夢斷無因到。唯有同棲鶴一雙。

太守兄見遺紙帳仍贈以詩次韵奉謝

湘娥翦水霜刀勻。虛室生白無纖氛。壺中但覺風雨隔。殿裏豈知天地分。蟾光夜明楮葉露。蝶夢春繞梨花雲。恍然置我銀世界。縱有瓊瑤難報君。

鶴年弟盡棄純綺故習清心學道特遺楮帳資其澹泊之好仍侑以詩

誰擣霜籐萬杵勻。製成鶴帳隔塵氛。香生蘆絮秋將老。夢熟梅花夜未分。枕上不迷巫峽雨。牀頭長對剡谿雲。竹盃松火茶煙煖。一段清貞盡屬君。

渡鄞江後託寄陸時敏陳可立

小艇橫江捷似飛。故人凝睇送將歸。過山殘照明紗帽。渡水浮雲亂苧衣。沙鳥渚禽同泛泛。岸花汀草各依依。風塵來往慚經濟。擬著漁蓑坐釣磯。

五言絕句

題畫梅二首

松筠掩雨雪。桃李逐風塵。不有梅花樹。誰回天地春。
鐵石挺孤杓。冰霜抱貞素。一笑桃李空。嗟哉歲云暮。

將歸武昌題長江萬里圖二首

長江千萬里。何處是儂鄉。忽見晴川樹。依稀認漢陽。
長嘯還江國。遲回別海鄉。春潮如有意。相送過潯陽。

七言絕句

讀鄭家規

每病漢民歌布粟。忍聞秦俗德耨鋤。鄭家九葉猶同爨。風化今知古不如。

題梅花扇面寄五十僉憲

憶向西湖踏早春。萬花如玉月如銀。一枝照影臨清淺。滿面冰霜似故人。

題族兄馬子英進士梅花

池館春深看牡丹。五陵車馬隘長安。誰知凜凜冰霜際。卻是梅花守歲寒。

題族兄馬子英進士竹石嘉樹圖

翠實可充丹鳳食。喬枝仍待早鶯遷。一拳蒼蘚荒秋雨。惆悵無人解補天。

題表兄賽景初院中新竹

景初故咸陽王
孫與赤孫也

雙玉亭亭出粉牆。便添風月入吟觴。會看直上三千尺。截簡先書異姓王。

贈表兄賽景初

蕭條門巷舊王孫。旋寫黃庭換綠樽。富貴倘來還自去。只留清氣在乾坤。

雨窗宴坐與表兄論作詩寫字之法

南窗薄暮雨如絲。茗椀薰鑪共論詩。天趣悠然人意表。忘言相對坐多時。
挺按元本鑪作爐今訂正

蠅頭小楷寫烏絲。字字鍾王盡可師。忽悟庖犧初畫象。工夫元不在臨池。

題顧仲贊先生南山遺稟後

玄豹無心守九關。日隨霧雨隱南山。莫嗟遺鞞同羊犬。猶託文章見一斑。

題林泉野趣圖

清江白石帶疏林。樊口幽居尚可尋。夢裏草堂無恙在。秋風春雨總關心。

...

...

...

...

...

...

...

...

...

...

...

...

...

...

...

...

丁鶴年集卷二

哀思集

海濱避兵時所作

五言古詩

歲晏百憂集二首

歲宴百憂集。獨坐彈鳴琴。琴聲久不諧。何以怡我心。拂衣出門去。荆棘當道深。還歸茅屋底。抱膝梁父吟。歲宴百憂集。擊筑發商歌。商歌未終調。淚下如懸河。故鄉渺何許。北斗南嵯峨。有家不可歸。無家將奈何。奉懷九靈先生就次其留別舊韻二首

晴霞麗層霄。淑景媚清曙。冉冉草際煙。盈盈花上露。幽禽何處來。飛鳴入庭樹。不見心所親。坐待停雲度。攀桂月扶疏。撫松雲陸離。豈無淡薄懷。亦有幽貞期。何緣對清景。孤坐度芳時。故人不可見。新交非所知。

秋蕙

淥水出紅蕙。清麗世無比。旭日照新妝。盈盈明鏡裏。亦有後時者。淒然抱孤蕊。欲開風露寒。寂寂含香死。

七言古詩

黃鶴樓

半空金碧何代樓。仙人鶴駕曾一遊。雕檻看雲楚山曉。珠簾捲月湘江秋。樓前雲月長無恙。欄賦崔詩角。

清壯西風忽動塵。仙人仍歸九天上。

植樗軒爲天台吳處士賦

徂徠蒼松榦。嶧陽孤桐枝。矯矯臥龍節。娟娟棲鳳姿。桐中琴瑟松棟梁。采之斲之生輝光。明堂清廟卽登用。回首故山雲路長。鳳凰不來龍亦去。樗散當軒承雨露。

五言律詩

病衰

病骨秋增痛。衰容日減華。臉霞憐竹葉。鬢雪妒菱花。往事嗟何及。歸程望轉賒。少年歌舞地。此日屬誰家。

輓唐都事

十年滄海上。辛苦贊戎機。帷幄籌雖在。轅門事已非。黃金從百鍊。白壁竟全歸。生死俱無恨。千秋仰德輝。

五言排律

逃禪室述懷十六韻

出處兩茫然。低徊每自憐。本無經國術。仍乏買山錢。故邑三千里。他鄉二十年。力微歸計杳。身遠客心懸。桃李誰家樹。禾麻傍舍川。鶉衣秋屢結。蝸室歲頻遷。逝水終難復。寒灰更不然。久要成齟齬。多病復沉綿。俯仰衷情倦。棲遲野性便。延徐誰下榻。訪戴獨回船。恥洒窮途泣。閒修淨土緣。談玄分上下。味道悉中邊。有相皆虛妄。無才幸苟全。棲雲同白鹿。飲露效玄蟬。高蹈慚真隱。狂歌愧昔賢。惟餘空念在。山寺日逃禪。

題蕪湖辛順中西圃卷

坐閱桑田變。歸爲菽水謀。聊從西圃隱。少慰北堂憂。汲月滄江曉。鋤雲沃野秋。新蔬和雨摘。碩果帶霜收。嘉樹巢烏鳥。閒庭下白鷗。管寧金不顧。季路米應求。千載誰同調。東陵有故侯。

七言律詩

脫太師

淮海重聞斧鉞臨。一時士庶盡傾心。雷霆聲播天威遠。霖雨恩添帝澤深。暗室有蠅汙白壁。明廷無像鑄黃金。風塵未息英雄死。坐對江山慨古今。廷按明刻像作象。蓋古無像字。

新公子

中朝公子多才俊。瀟灑風塵獨靳侯。白鴈久無天上信。黑貂漸弊雪中裘。虛堂簾影遲遲晝。別館燈光淡淡秋。到手深杯須劇飲。醉鄉消得古今愁。廷按明刻弊作敝。

故宮人

粉愁香怨不勝情。強整殘妝對老兵。別殿金蓮餘故步。後庭玉樹變新聲。眼穿鴈字雲連塞。夢斷羊車月滿城。天上桃開王母去。世人誰識許飛瓊。

別帽

雲襟飄蕭月襟團。百年雄麗壓南冠。黃金綴頂攢文羽。白壁垂纓間木難。刺繡尙期平敵壘。簪花曾夢舞

仙壇一從吹墮西風裏。誰念蒙塵白髮寒。

元夕

燈火樓臺錦繡筵。誰家簫鼓夜喧闐。光移星斗天逾近。影倒山河月正圓。金鎖開關明似晝。銅壺傳漏迥如年。五雲不奏霓裳曲。空使揚州望眼穿。

雪後泛東湖

雪後湖山玉作圍。小舟乘興弄清輝。貪看月裏鸞回舞。不覺風前鶴退飛。雲母屏空春閨寂。水晶宮冷晚霏微。仙家一笑乾坤老。誰馭瑤池八駿歸。

題鳳浦方氏梧竹軒

鳴鳥曾聞此地過。至今梧竹滿丘阿。政懷翦葉書周史。卻恨翻枝入楚歌。金井月明秋影薄。石壇風細晚涼多。中郎去後多知音。少共負奇材奈老何。

題戴先生九靈山房圖

九靈別業何年到。聊作新圖寄所思。幽谷白雲晴窈窕。高檐翠樹曉參差。輞川已入王維畫。韋曲曾傳杜甫詩。咫尺相望成萬里。臥遊心事許誰知。

二靈寺守歲

守歲山房迥絕緣。燈光香燭共蕭然。無人更獻椒花頌。有客同參柏子禪。已悟化城非樂界。不知今夕是

何年憂心悄悄。渾忘寐。坐待扶桑日麗天。

元旦寄朝真宮諸道侶

窮陰殘臘喜全消。淑景新正覺倍饒。一氣輓春回厚軸。五雲扶日麗層霄。媚時久厭銀旛巧。卜歲深期玉燭調。最愛羣僊持絳節。朝真不憚九天遙。

暮春感懷二首

杜宇聲聲喚客愁。故園何處此登樓。落花飛絮成春夢。膽水殘山異昔遊。歌扇多情明月在。舞衣無迹綵雲收。東皇去後韶華盡。老圃寒香別有秋。

四十無聞嬾慢身。放情丘壑任天真。悠悠往事杯中物。赫赫時名扇外塵。短策看雲松寺晚。疏簾聽雨草堂春。山花水鳥皆知已。百徧相過不厭貧。

奉寄王宜慰兼呈九靈先生

別館新成足宴游。珊瑚環珮總名流。獨推南郭爲高士。共識東陵是故侯。天上鶯花三月夢。人間風雨五更愁。行藏盡付浮雲外。爛醉豐年黍稷秋。

奉寄九靈先生四首

挾海懷山謁紫宸。擬將忠孝報君親。忽從華表聞遼鶴。卻抱遺經泣魯麟。喪亂行藏心似鐵。蹉蛇勳業髮如銀。萬言椽筆今無用。閒向林泉紀逸民。
先生嘗爲予作傳

花柳村村接海濱。攜家隨處避風塵。衣冠栗里猶存晉。雞犬桃源久絕秦。對坐青山渾不厭。忘機白鳥自相親。也知出處關時運。豈但逃名效隱淪。

早將長策靖三邊。晚抱孤忠守一廛。出處久推張翰達。登臨重覺謝安賢。煙霞丘壑龍山屐。風月汀州鳳

浦船。東望三神纔咫尺。不妨來往挾飛仙。

龍山鳳浦皆海濱地名。

清泉白石兩翛然。仙隱何妨日似年。頗厭文章妨大道。卻從奇偶翫先天。雲間犬碓燒丹鼎。雨裏龍耕種玉田。終歲不聞城府事。閉門閒著養生篇。

寄定海故將軍邵公輔

往事浮雲杳莫攀。壯懷未展鬢先斑。不聞奉使通銀漢。空見將軍老玉關。故壘荒涼千騎盡。滄溟浩蕩一鷗閒。風塵隨處嚴詞止。愁殺田間夜獵還。

逃禪室與蘇伊舉話舊有感

不學揚雄事草玄。且隨蘇晉暫逃禪。無錐可卓香嚴地。有柱難擎杞國天。謾詫丹霞燒木佛。誰憐清露泣銅仙。茫茫東海皆魚鼈。何處堪容魯仲連。

寄餘姚滑伯仁先生

獨木橋邊薜蘿門。全家移住水雲村。猿聲專夜丹山靜。屢氣橫秋碧海昏。詩卷自書新甲子。藥壺別貯小乾坤。陶漁耕稼遺風在。差勝桃源長子孫。

寄餘姚宋無逸先生餘姚有舜工夏山漢劉使君雙夫人仙迹

龍泉城外絕鷲喧。寄傲全勝在漆園。獨對江山懷舜禹。每憑風月問劉樊。行窩釀酒花圍席。野寺題詩竹滿軒。回首崑岡空劫火。深期十襲保瓊瑤。

雨中寄澗河楊彥常先生

山中長夏苦淫雨。暫爾出門還不能。九天馭日力已竭。兩地看雲愁倍增。憐君畏途久作客。笑我淨土常依僧。相思倚柱發清嘯。旁人不解谷空騰。

贈全真李止冰止冰故成順王門人也

玄元孫子玄都客。汗漫長遊宇宙間。黃鶴白雲迷鄂渚。青牛紫氣滿函關。袖中寶劍雌雄合。鼎內金丹大小還。不見吹笙王子晉。秋來幾度候緱山。

勞勞

閭闔排雲事已休。勞勞猶恥爲身謀。數莖白髮未爲老。一寸丹心都是愁。燕代地高山北峙。荆揚天闊水東流。英雄已去空形勝。劍氣中宵射斗牛。

兀兀

數莖白髮鏡中新。兀兀窮年愧此身。萬里雲霄雙倦羽。千尋江海一窮鱗。望鄉薄暮憑西日。去國中宵禮北辰。客路漸遙身漸老。此生何以報君親。

題太守兄遺藁後二首

太守兄死事之明年于故篋中得其遺詩一卷伏讀之次不知涕泗之橫流也敬題二詩于後以紀哀思云

海國期年政化成肩輿隨處看春耕正欣雞犬無驚擾詎意鯨鯢有鬪爭遙島月明虛燕寢故人雲冷失佳城夢回佳句難重得腸斷池塘草又生

黑風吹海浪如山獨跨長鯨去不還身世雲煙遊物外文章奎壁照人間彤庭朝朔雙鳧遠五馬行春綠野閒老我急難餘淚在一回撫卷一潺湲

磁按明刻五馬二字與綠野互換

逃禪室臥病有懷故鄉東諸友生

謀生失計倍淒涼扶病將歸自激昂那得金丹生羽翼只將鐵石作肝腸日長獨臥維摩室歲晚全荒陸氏莊幸際諸公各當道應思孤客久迷方

兵後還武昌二首

避亂移家大海隈楚雲湘月首頻回歸期實誤王孫草遠信虛憑驛使梅天地無情時屢改江山有待我重來白頭哀怨知多少欲賦慚無庾信才

亂定還家兩鬢蒼物情人事總堪傷西風古冢遊狐兔落日荒郊臥虎狼五柳久非陶令宅百花今豈杜陵莊舊遊回首都成夢獨數殘更坐夜長

夢得先妣墓

己未夏五月。還武昌遷葬。兵後陵谷變遷。先妣封樹。竟迷所在。久尋不得。露禱大雪中。多十一月廿日夜。忽感異夢。翼日遂得其處。賦詩一首。以紀歲月云。

慈顏幽翳杳難知。風雪孤村徧訪之。極浦空江泥滑滑。荒岡斷壠冢纍纍。那知恍惚魂歸夜。正是呼號淚盡時。孝格皇天吾豈敢。聊同烏鳥報恩私。

過九江追悼李子威太守

瓣香遙拜九江城。太守精誠日月明。叔姪並歸忠義傳。江山不盡古今情。潮回溢浦聲猶怒。雲起爐峯氣未平。生死總魁天下士。丈夫端不負科名。

哭陣亡仲兄烈瞻萬戶

獨騎鐵馬突重圍。斬將擐旗疾似飛。金虎分符開幕府。玉龍橫劍衛邦畿。委身徇國心方盡。裹革還鄉願竟違。病臥滄江憐弱弟。看雲徒有淚霑衣。

奉懷先師豫章周孝思先生

先生有道負清時。經濟何由見設施。白水青山聊自適。光風霽月復誰知。出塵標格三株樹。瑞世文章五色芝。鳴鳥不聞人亦去。生芻一束起遐思。

七言排律

告牒還武昌遷葬上明州太守茶子俊

漢江東抱楚山流。先壠猶餘土一杯。廟冷桐鄉耆舊逝。田荒粟里子孫愁。兵戈隔夢三千里。霜露傷心二十秋。荒隄天寒烏鳥下。空林日落白狐遊。碑楚斷石經時變。盤出道金有夜偷。過客尙知來下馬。仙翁誰復指眠牛。擬從樊口遷京口。遙別沙頭下石頭。高士束芻思致奠。故人惠麥久維舟。已知多病垂垂老。敢爲長貧故故留。爲政幸逢宗正恕。申情當念子平憂。劬勞罔報生何益。存歿沾恩死必酬。願及清明三月節。一盃麥飯洒松楸。

告牒還武昌省墓投贈鍾經履

穎川家世少游車。大府從容贊畫餘。泛水依蓮饒勝賞。飲冰啖藥富清譽。黃談賓幕風生席。退食公庭月照閭。最愛小胥勤吏牘。更逢太守重詩書。登樓望海吟懷遠。拄笏看山雅度舒。藥籠參苓隨選擇。花谿桃李藉吹噓。殊方有客飄零久。先壠無人拜掃疏。化筆久推公道在。況曾同食武昌魚。按穎川當作穎川

守墓陳情上武昌太守傅藻

蕭蕭五馬駕雙旌。太守承恩下玉京。氣槩浮雲蒸華嶽。胸襟弱水浸蓬瀛。擁經束出辭儲館。分竹西來鎮鄂城。地轉陽春蘇赤子。天回霖雨濟蒼生。埽除積弊文書簡。慰藉羣情賦斂輕。每以哀矜存愷悌。還從適發見神明笑談頓息清河訟。指顧潛消渤海兵。已喜箕裘傳傳說。行看車馬賜桓榮。閭閻有學皆興起。畎畝無田不播耕。縣榻每因高士下。清樽多爲上賓傾。過山問俗雲生屐。出郭劬農雨溼纓。月滿南樓揮麈

坐花明北樹引車行。題詩每擬招崔顥。作賦何曾厭禰衡。感化屢聞虢虎渡。忘機不使狎鷗驚。滿門桃李新陰暖。徧野桑麻晚色晴。汗簡定應書善政。口碑先已播賢聲。肯憐倦客垂青盼。特爲明公寫素誠。作縣前人書上考。登科後裔廁羣英。亂離一去榮華盡。契闊重來坎壈嬰。豈爲尊羹思故里。敬將麥飯洒先塋。陶潛柳盡家何在。潘岳花殘邑屢更。鶴髮遺民供祀事。龜趺斷碣載題名。獨歸華表叮嚀語。誰顧鹽車俛仰鳴。往事易成蕉鹿夢。舊遊難覓黍雞盟。履殘濡露心逾苦。目斷停雲淚更橫。已幸玄堂新改厝。猶慚丙舍未經營。名隨版籍遙編越。身戀松楸重去荆。存歿離魂同慘慘。往還孤影復兢兢。敢方王粲依劉表。竊冀興宗念子平。爲政古來先孝悌。願伸人子未伸情。

過安慶追悼余文貞公

將軍匹馬入舒城。擊賊頻煩訓義兵。孝以保家忠徇國。聚而出戰散歸耕。團伴月暈全無隙。捷振天威大有聲。游說飛書徒間諜。輸誠伏節愈堅貞。雲梯屢卻妖氛豁。露布交馳殺氣平。千里荆揚憑保障。七年淮海賴澄清。山深禦獮殲遺出。江闊鯨鯢斬更橫。外援內儲俱斷絕。裹瘡飲血獨支撐。天昏苦霧埋營壘。日落陰風卷旆旌。甘與張巡爲厲鬼。骨同王衍誤蒼生。三千將士皆從死。百二山河亦繼傾。靜對風靈思號令。遙從箕尾識精神。頌碑不愧詞臣色。哀詔偏傷聖主情。願爲執轡生不遂。臨風三酌重沾纓。按精神

讀應奉兄登科記愴然傷懷因成八韻

射策彤庭被寵榮。遺編三復若爲情。重傷趙璧經時毀。翻恨隋珠徹夜明。洪範有書傳太乙。佳城無郭葬

長庚青雲路斷甘淪沒。碧海塵飛苦變更。自信爲臣當委質。誰能向賊更求生。家貧寡弱遺妻子。道遠存亡隔弟兄。一旦音容成永訣。十年涕淚鎮交橫。茫茫原隰無求處。獨立長風送鴈聲。

五言絕句

題天柱山圖

拔翠五雲中。擎天不計功。誰能凌絕頂。看取日升東。

畫蟬

飲露身何潔。吟風韻更長。斜陽千萬樹。無處避螿螂。

畫古木幽篁

碧海珊瑚樹。清湘翡翠毛。無因將寄遠。日暮寸心勞。

畫葡萄

江海春雷動。羣龍悉上天。秋來風露冷。箇箇抱珠眠。

題江亭柳色圖有懷故人劉庸道

昔年驪酒地。江漢一茅亭。同會人何在。東風柳又青。

先兄太守死事之十有七年于故史董文中家見所題竹詩因雪涕謹次其韻

玉筍謝朝班。西風海國寒。無人知苦節。落日下長安。

雨過蛟龍起。風生翡翠寒。但存清節在。日月是平安。

右畫竹元德爲文中題

七言絕句

敬書宸翰後

神龍歸臥北溟波。愁絕陰山敕勒歌。惟有遺珠光奪月。萬年留得照山河。

題荊郎天馬圖

春明立仗氣如山。顧盼俄空十二閑。一去瑤池消息斷。西風吹影落人間。

題桃源圖

放舟長怪武陵人。強覓桃花洞裏春。若使仙源通一線。如何避得虎狼秦。

暮春二首

楊花榆莢攪晴空。上界春歸下界同。蜂蝶紛紛竟何在。獨留杜宇怨殘紅。
一夕春歸徧九垓。千紅萬紫委塵埃。韶光淑氣逡巡退。暑雨炎風爛熳來。

題畫

江樹青紅江草黃。好山不斷楚天長。雲中樓觀無人住。只有秋聲送夕陽。

題萬歲山翫月圖

金銀樓觀鬱嵯峨。琪樹風涼秋漸多。徙倚危欄倍惆悵。月中猶見舊山河。

題故人毛楚哲所畫葡萄

西域葡萄事已非。故人揮洒出天機。碧雲涼冷驪龍睡。拾得遺珠月下歸。

榮枯

春意方酣紅杏藥。秋聲又戰碧梧枝。野人不識天官麻。坐閱榮枯紀歲時。

春谷二首

...

...

...

...

...

...

...

...

...

...

丁鶴年集卷二

方外集

五言古詩

贈劉全真

峨峨崆峒山。去天不盈尺。西挹弱水流。東挂扶桑日。中有學仙人。眉白雙眼碧。餐霞衣雲霧。凝神鍊精魄。
搏龍及猛虎。視之如蟻蝨。功成朝紫皇。名隸丹臺籍。幡然汗漫遊。飛行隘八極。滄海重揚塵。蟠桃幾結實。
天上與地下。俯仰成陳迹。歸來斂衽坐。倒卷入冥寂。萬象吾肺腑。四氣吾嘘吸。乃知大還資。不離嬰兒質。
蚩蚩世間人。斷喪良可惜。

觀鄭高士坐圓

凝身危石踞。屏息遊絲搖。電光射玄關。龍虎聲咆哮。大君寂不動。萬象俱來朝。甘露降瓊田。五色發靈苗。
何必入青冥。然後爲逍遙。

風泉清聽詩爲文極禪師賦

幽棲空谷中。石室如懸磬。坐閱造化機。動靜互相勝。風生萬籟隨。雨過百泉應。蕭蕭亂疏鐘。泠泠隱清磬。
虎嘯山月昏。龍吟海波靜。上人謝聲塵。悠然入深定。喧寂兩俱忘。是乃名真聽。

白雲精舍詩爲諸賢上人賦

白雲何處來。油然在巖岫。下有古精藍。凌雲起華構。吐吞金碧輝。隱見林泉秀。常從護法龍。低接噴香獸。覺花曠益明。忍草滋逾茂。高僧亦無心。怡悅坐清晝。安得乘長風。徧界陰涼覆。法雨澤羣生。普使躋仁壽。

七言古詩

環翠樓歌

大山摩穹霄。小山翻洪濤。或翔丹穴鳳。或舞寒江蛟。奔騰起伏。奇觀不可狀。雲錦屏風金碧障。中有仙家太古壇。烏啼花發春自閒。子晉鸞笙乘月過。王喬鳧舄凌雲還。環翠樓開紫霞裏。更揖雞峯朝舜水。千巖秀色傍窗浮。萬壑濤聲從座起。煙消日出天溶溶。玉壺倒插金芙蓉。鉤簾相對坐長夏。洒然冰雪生心骨。君不見天台嵯峨四萬八千丈。若非飄車羽輪那得上。又不見終南盤亘中原五百里。天梯雲棧懸絕那可履。何如羽人高居環翠樓。調笑日月輕公侯。仙韶靈響每坐聽。日觀霞城時臥遊。還丹鍊就顏如玉。讀書學道日不足。琅函金檢五千言。錦帙牙籤三萬軸。星爲冠兮霓爲裳。或參麒麟翳鳳凰。翩翩上遊白雲鄉。手把絳節朝紫皇。鈞天九奏賜霞觴。醉乘冷風還下方。眼空四海小八荒。層樓棲真壽而昌。此名此境孰敢當。蓋山道士身姓梁。

贈玄漠鍊師

神仙中人毛外史。方瞳深碧蚪髯紫。了知大道本無爲。況是谷神元不死。偶因救旱驅玄漠。倒瀉銀漢如

建瓴功成不居拂衣去。洞庭渺渺君山青。

武昌送僧淨皓書童正思所作詩序後

童郎豪爽士。生平少許可。獨於皓上人。珠璣發咳唾。上人學法英妙年。參徧諸方文字禪。鐵鞵踏破石頭路。教外方知別有傳。童郎我同道。上人我同鄉。相逢江上折官柳。離思悠悠江水長。

五言律詩

寓慈湖僧舍次龍子高提舉韻

迢遞過蘭若。淹留爲竹林。疏鐘雲嶠迴。孤竹雨窗深。長嘯非懷昔。狂歌豈避今。祇緣諸漏盡。不受一塵侵。

慈谿報國寺度夏寄甬東椿上人

一徑野雲深。僧關闕綠陰。雨腥龍出澗。風勁虎過林。澹泊資禪味。清涼養道心。三生如不昧。石上一來尋。

涵清軒爲慈谿懋上人賦

止水纔盈掬。涵空有底寬。王壺秋影淨。金鏡曉光寒。落月斜沈白。流霞淺浴丹。上人方宴坐。應向觀中看。

贈李仙姑

同年萼綠華。來降地仙家。花擁青鸞節。香隨白鹿車。清輝回雪月。玄想結雲霞。不赴瑤池宴。桃開幾度花。

五言排律

送武昌鐵佛寺盟長老還襄陽

盟居襄陽。父死方在殯。遇亂奉母逃難江南。餘三十年。嘗典藏鑰於蔣山。主武昌鐵佛寺。而重興之。及今道路既通。乃奉母北歸而葬其父喪。士大夫以爲方外所未有。咸作詩文美之。鶴年因製五言排律二十韻。以附其卷末云。

襄漢揚波日。江湖避地時。行行隨老母。處處禮名師。雲水元無住。風塵信所之。陸州勒奉養。江革備艱危。掌鑰鍾山下。傳燈鄂渚湄。牘翻龍藏典。幾詠鶴樓詩。深慨叢林廢。眞成一木支。銅仙頻閱世。鐵佛重開基。法几雕文貝。靈旛刺綵絲。雲鐘晨縹渺。月殿夜參差。已悟無生法。還興罔極悲。他鄉流徙遠。先壠奉遷遲。頓洞今方息。旋歸故可期。望雲雙淚瀉。計日寸心馳。官柳催飛錫。曇花侑奠儀。旣明埋玉理。豈是繫珠癡。定應眠牛兆。毋生觸鹿疑。春暉憐舊線。秋露薦新祠。生死俱無憾。諸方起孝思。

送鐵佛寺益公了庵朝京遊浙

世尊出西域。教化極東土。大道本無爲。盛德人所慕。只今滅度二千年。授經弟子如親傳。我生癩僻苦貪佛。或謂三生有勝緣。武昌鐵佛古名刹。兵燹薦臻孰承乏。益公崛起振宗風。至味啗人如嚼蠟。相逢一笑卽相親。下榻東軒忘主賓。熏鑪茗椀坐清夜。從容輒語溫如春。曉來別我朝京國。短策輕包適吳越。吳越山水天下奇。寶坊金刹皆人傑。公今參訪必遇人。六根一掃無纖塵。錢唐潮音華頂月。獨露堂堂見本眞。從此平生大事畢。頓覺身心樂無極。鷗翻大海水逆流。半夜中天出紅日。我有故人僧中雄。不遠千里來詩筒。煩公問訊向何處。說法今留兜率宮。

七言律詩

題昌國普陀寺二首

神龍屹立戴崔嵬。俯瞰滄溟水一杯。積翠自天開罨畫。布金隨地起樓臺。祈靈漢使乘槎到。傳法胡僧折葦來。若使祖龍知勝槩。豈應驅石訪蓬萊。
一從劫火起燕然。字內名山悉變遷。古刹獨存龍伯國。豐碑猶記兔兒年。三更日浴咸池水。八月潮吞渤海天。雲漢靈槎如可御。便應長往問羣仙。

寄見心長老二首時陞住靈隱

豫章老子最能文。禪海詞林總逸羣。弧矢機鋒天下避。圭璋聲價日邊聞。晝長經閣繙新鈔。歲晚詩壇策舊勳。自古靈山名勝地。幾多龍象望慈雲。

上方借榻動經春。道義交情久更親。滌器每憐司馬病。卓錫不厭仰山貧。茶煙隔座論文夜。花雨霑筵聽法晨。一自天香通鼻觀。六根無處著纖塵。
師號天香老人

秋夜宿定水寺天香閣有懷見心長老

寂寂雙峯暎澗流。重來托宿敞雲樓。窗涵虛白三更月。簾捲空青一色秋。頗有高情酬勝賞。可無奇句入冥搜。天風開徧巖前桂。誰爲蒸香寄澹遊。

寄昌國濟汝舟長老
先兄太守嘗題詩于裏方丈

西江禪伯住東溟。境接蓬萊地最靈。浙水秋濤浮座白。扶桑朝影拂檐青。已無鶴近雲間錫。祇有龍聽月下經。李白騎驢天上去。題詩誰復扣巖扃。

寓奉化寄菩提寺主

菩提嶺外空王寺。丹磴行穿虎豹羣。萬壑濤聲巖下瀑。千峯雨氣屋頭雲。海龍送水金瓶貯。天女懷香寶鼎焚。慚愧無緣塵土客。朝朝鐘鼓下方聞。

奉寄恕中韞禪師

曾向名山識異人。心如木石氣如春。坐禪霜葉秋埋膝。行道天花日繞身。有鉢相傳元是幻。無錐可卓本非貧。惟餘潭底中秋月。對寫龍峯面目真。時留龍峰傳燈。

寄龍門海禪師

予自海東初回龍門嘗招予入社故有還家鶴之喻。

曾向龍門俯急流。泰山如垤海如瀉。學仙漫比還家鶴。作佛須看露地牛。遠岫孤雲歸薄暮。澄潭一月印新秋。葛川舊有三生約。擬策枯藤到上頭。

寄東湖澹天淵長老伯仲

平湖一鑑涵空明。千巒照影羣峯晴。慈雲或將花雨過。幽泉盡學松濤鳴。清猿對戶忽長嘯。老鶴下階時獨行。何人最得此中趣。無著天親好弟兄。

送鐘聲外侍者還定水寺

侍者乃見心長老入室高弟。

侍者還山修白業。何須門外問三車。微塵有相皆成幻。天道無岐直到家。月滿秋巖收桂子。雪消春澗采蒲芽。阿師弘教人獅子。佇見傳衣後代誇。寺有天堂室。蒲菴故云。

送信立菴長老住靈巖寺

寺即吳王避暑宮池山中。古述有香徑。硯池。涵空閣。

上人駐錫靈巖寺。正是諸天聽法時。日下旛幢朝旆旆。雲間鐘鼓晝遲遲。殘紅掩冉迷香徑。空翠溟濛落硯池。不盡平生懷古意。涵空閣上一題詩。

題東湖青山寺古鼎銘長老鍾秀閣

手開樓閣貯羣經。面對湖山衛百靈。玉鏡夜寒通沆瀣。翠屏秋淨倒空青。避煙鶴起檐間樹。行雨龍歸几上瓶。我亦逃禪雲水客。便應蕭散共松扃。

題澹天淵長老二靈山房在東湖

寶刹憑虛戶牖開。羣峯北走水南回。六鼇夜涌金銀闕。九鳳朝翔紫翠堆。日淨雲間飛錫下。月明天上渡杯來。談玄每就巖房宿。最愛三車有辯才。

澹然齋爲慈谿潤上人賦

寂寂禪扃掩晝陰。阿師道味此中深。一塵不涉冰霜操。萬境俱空水月心。駐屐寒香生小徑。捲簾秋色上疏林。莫愁客至無清供。玄酒盈樽好共斟。

悠然軒爲慈谿教上人賦

香消靜室定回時。真趣忘言祇自知。雲淡風輕天蕩蕩。鳶飛魚躍晝遲遲。傳來西竺元無法。坐對南山或有詩。不是淵明來入社。百年誰與共襟期。

清勝軒爲姑蘇潤上人賦

繞屋松杉手自栽。重陰長日護蒼苔。一谿窈窕花間入。三徑參差竹下開。夜半霜鐘寧假蒞。秋深月鏡本無臺。主人定起焚香坐。何處扁舟棹雪來。

些子景爲平江韞上人賦

尺樹盆池曲檻前。老禪清興擬林泉。氣吞渤澥波盈掬。勢壓崆峒石一拳。彷彿煙霞生隙地。分明日月在壺天。旁人莫訝胸襟隘。豪髮從來立大千。

半村詩爲姑蘇信立菴禪師賦

菴居背郭稱疏慵。道韻清孤野趣濃。花徑縈回通小市。竹窗窈窕納遙峯。五更風遞巖城角。半夜霜清古寺鐘。昨日鄰翁告東作。四郊春雨起降龍。

雲石詩爲貞長老賦

坐石看雲絕百非。空山終歲澹相依。臥龍春暖潛嘘氣。伏虎年深不振威。已向諸天陳瑞彩。更從歷劫拂銖衣。驀然觸著無拘礙。蕩蕩乾坤自在飛。

白石詩爲琦公宗師賦

雪色雲根出翠微。堅貞不與道心違。塵空自比仙人鏡。路滑誰參佛祖機。豈爲礪金希世用。都緣韞玉發山輝。點頭默契生公法。絕勝商歌歎短衣。

寓東湖二靈寺

二靈古稱山水窟。興來獨往亦一奇。扣舷時聞小海唱。奪卷復觀長江詩。月中聽鶴坐不寐。煙外盟鷗歸每遲。桃花流水儻得路。便應黃髮爲漁師。

次義上人韻

冥棲九隴傍雲松。茗盃熏爐取次供。月滿長空秋放鶴。雨昏大海晝降龍。病中普施諸方食。定裏長聞上界鐘。明齋古來多玩世。不妨隨處舞三筇。

再用前韻贈祖庭興上人

匡廬攬秀昔巢松。水色山光左右供。日下奇峯金作鳳。雲間飛瀑玉爲龍。撲簾空翠沾晴几。拍枕寒濤隱暮鐘。從此胷中富丘壑。乾坤萬里一吟筇。

悼湖心寺壁東文上人

祇林一葉隕秋霜。回首滄洲淚兩行。几上殘經塵已暗。篋中遺藁墨猶香。雲迷圓澤三生石。月冷維摩十笏房。想像清容何處記。寒梅的的竹蒼蒼。

山居詩呈諸道侶三首

一榻東軒迥絕緣。寒巖枯木共忘年。雖非悟道龐居士。豈是耽詩賈閬仙。禪定儘教崖石坐。法音都付澗湍傳。騰騰終日無他伎。只辨飢餐與困眠。

日日看山眼倍明。更無一事可關情。埽開積雪巖前坐。領取閒雲隴上行。不共羽人談太易。懶從衲子話無生。劃然時發蘇門嘯。遙答風聲及水聲。

懶散形骸不自持。黃冠聊束鬢邊絲。頻來猿鶴渾相識。久混龍蛇竟不知。養拙最宜情澹薄。全生深藉德支離。看雲本自忘飢渴。況有冰泉與石芝。

逃禪室解嘲

久慕陶公臥北窗。還從馬祖吸西江。掃愁那用千金帚。折慢惟瞻七寶幢。日晏捲簾延疊幃。雨晴欹枕聽流淙。周妻何肉俱無累。祇有詩魔孝未降。

寄鄭高士

閉門凝坐學長生。七返還丹一息成。野服春深裁白苧。山庖日午薦青精。煙中鹿引朝真駕。月下鸞隨度曲笙。卻笑秦人太癡絕。樓船萬里訪蓬瀛。方瞳廣穎占先生。氣秉先天獨混成。辟穀齋房餐石髓。採苓幽澗役山精。星辰夜動龍纏劍。風露秋清鶴載笙。別後仙蹤杳難覓。相思幾度夢登瀛。

七言絕句

元旦與天淵長老雪中泛谿因而嘲及

不將柏葉團爐飲。卻爲梅花放棹看。詩在霸橋驢子上。阿師空忍雪山寒。

迎大年椿上人不值暮歸偶成

東歸聞道已浮杯。力疾遙迎日幾回。何處晚來成誤認。風簾竹影月窗梅。

題大年椿上人梅花

娟娟淨色雪消餘。翦翦寒香月上初。杓格若教諸佛見。肯將薺蔔譬眞如。

寄龍門禪師二首師自號補衲

上方樓閣煙霞補。衲重來歲月賒。拄杖入門如隔世。依然翠竹對黃花。
靈山積雪赤城霞。咫尺東西路不賒。破碎衲衣剛補就。不煩天女散天花。

題天師竹

琅玕仙節鬱蕭森。知受三天雨露深。投老相求訪眞訣。獨騎龍杖度千岑。

丁鶴年集卷四

續集

兵後還武昌所作

五言古詩

鄞江張孟善氏貌古性方好直言慕王陵汲黯之爲人與俗多忤因扁其所居之室曰戇庵以自況
室傍別開小圃圃中無花卉蔬果之冗唯植藥數畦以資鄰里之貧病者其友西域鶴年取古史苦
言藥也之遺意作戇夫治藥圃詩以貽之其詞曰

小圃不盈畝。偏側背江郭。種藥有戇夫。庵居甘澹泊。參苓充服食。杞菊成帷箔。抱甕不辭勞。荷鋤寧改樂。
平生慕陵黯。直道盡謬謬。固知逆耳言。卽是瞑眩藥。世無狄公籠。誰收治民瘼。何須持方柄。齟齬納圓鑿。
余亦種瓜人。歲晏同盤礴。按元刻明刻柄俱作柄今改正

贈醫士樂孟傑

越人有至鑑。明德以爲基。視疾洞表裏。談笑驅三尸。神聖不自居。託人飲上池。今人重勢利。晝夜營己私。
心志先蠱惑。仁術詎能推。明哲有深戒。弗治爲中醫。樂也孝廉士。天錫仁壽資。蚤歲失所怙。長懷罔極悲。
力學岐黃術。百歲奉慈闈。朱顏嘆華髮。和氣春熙熙。因推老老意。遂及親與知。東鄰抱膏盲。西里困瘡痍。
刀圭一入口。沈痼忽若遺。樂也無德色。賢聲日四馳。越人久羽化。緒言百世師。今古不二致。樂也其勉之。

梅林書屋爲四明陸秀才賦

陸郎好修士。讀書梅屋下。冰雪共清寒。風月同瀟灑。彈琴聊對花。調鼎須待實。豈無松竹交。歲晚爲三益。

題畫二首

天連翠障開。雨挾銀河瀉。中有澹蕩人。於焉結茅舍。朝漁曲渚湄。暮獵平林下。危途策羸驂。汨汨胡爲者。荒荒野日低。漠漠江雲冷。喬林延暮光。澄波浴秋影。高人千載懷。乾坤一漁艇。

送赤土礮巡檢徐白任滿

人生天地間。忠孝理最大。之子知所先。秉之若珪玠。小試弓刀職。長懷襁褓恩。由來忠蓋士。多出孝義門。便便善辭令。濟濟習容止。忠孝苟不立。絺繡如犬豕。羨子負才氣。玉立當青春。一飯不遑暇。志在君與親。桓桓領壯夫。赫赫巡大邑。鷗張悉就擒。鼠竊亦屏息。耕桑各按堵。老稚春風中。瓜期忽已屆。入謁蓬萊宮。車騎輓莫留。別我大江側。臨歧欲贈言。老病多慙德。青雲賢路開。俊又俱登庸。自此躋膺仕。毋忘孝與忠。

題胡公鼎碧梧軒

威鳳出羽族。乃爲王者瑞。飛翔九千仞。覽德斯一至。和鳴周室興。來儀舜廷治。高軒植碧梧。萬一幸而致。慨然千載懷。孰敢謂不智。奈彼積石遙。來往良不易。先生人中鳳。文章五色備。肯作朝陽鳴。亦足瑞斯世。

七言古詩

贈相工

德祐忠臣好孫子。爛爛日光巖電紫。人間富貴等浮雲。瓊瓊何煩挂唇齒。灑灑險蜀道難。曳裾傍人多厚顏。留取乾坤雙老眼。夕陽牛背看青山。

李孝子思親詩書揭祕監所撰李處士墓銘後

亭亭高岡松。上有雙棲鳥。朝出營其巢。暮歸哺其雛。雌雄和鳴尾畢逋。巢成雛長鳥雙殂。月明夜靜雛影孤。南飛繞樹聲號呼。西谿之澗南山之隅。銜土爲墓口卒瘁。蓬萊老仙憫其慈孝俱。錫以五色鳳凰羽。徑寸驪龍珠。光芒晝夜燭墓廬。哀衷旣慰情始舒。振迅羽翮思天衢。故巢歲晚牖戶虛。飄飄風雨無時無。繡補葺良艱劬。君不見秦家桂樹空扶疏。高枝卻使鷓鴣居。

奉寄武昌南山白雲老人

老人姓衛字君執

故人家住南山下。心與白雲共瀟洒。芝草遙廣黃綺歌。蓮花近入宗雷社。嗟予江海避風塵。白首歸來失所親。青眼相看如昔日。只有南山與故人。

送蔡士廉舍人奔赴還四明

公家東海濱。我昔共鄉縣。今同寓鄂渚。十年不一見。公從藩府典禮儀。入侍須早出每遲。不將汎愛要鄉譽。直以孤忠結主知。雪松貞操寒逾勁。冰蘗清聲老更馳。府中諸彥皆人傑。政事文章稱二絕。重公質樸古人風。平揖下堂要罄析。身名俱泰心獨悲。甘旨親庭千里隔。一朝海鶴寄雲槭。阿翁已作蓬萊客。仰觀喬木戰飄風。五內分崩面深墨。我聞往弔始見公。我足蹒跚公髮白。相看話舊重咨嗟。少日風流那復

得花明春泛越王湖。月皎秋尋賀公宅。賞花弄月秋復春。詩酒清狂多故人。直倚青年驕白日。豈知碧水揚黃塵。從此東西各星散。我憶同遊如夢幻。秋風江上漫思鱸。夜雨關河愁聽鴈。公當大事賜告歸。片帆東下孤飛雲。里中長老久相待。一見喜極還沾衣。儻問題詩者誰。子道卽遼東丁令威。

送奉祠王良佐奔討還鄆城

鄆爲禮義鄉。自昔多名士。佐也游夏徒。力學能崛起。三冬文史富。才華萬言入。對天王家騎。蟾秋折廣寒。桂走馬春看長安花。承恩筮仕御史府。風生臺閣膺僉舉。雅知嚴敬授祠官。奉禮山川來大楚。祠官清暇日有餘。焚香危坐讀父書。門外猶維桓典馬。釜中屢出菜蕪魚。嗟予老病衡茅下。時人棄置如土苴。多公高義數相過。茅塞心胷賴陶寫。霜風一夜吹庭闌。椿萱並悴色養違。再拜親王揮涕出。千里看雲匍匐歸。佳城已卜牛眠地。屏立泰山帶園泗。種松畚土展孝誠。傍水依山礪仁知。知明仁熟政乃工。終喪還謁蓬萊宮。致君堯舜付公等。仁令四海回淳風。五風十雨年屢豐。吾何幸爲田舍翁。

送奚仲瑛進士服闋朝京

奚郎健筆凌高秋。排雲直上蟾宮遊。一枝丹桂許先折。歸來兩袖天香浮。早年掄材服官政。百里秋毫歸藻鏡。躬承天語佐夏官。幕下清談烽燧靜。家書忽報丁內艱。讀禮還依孔子山。教育英才樂人樂。一旦徵書到巖壑。鯤鵬從此徙南溟。鳳凰仍舊巢阿閣。

題王大使望雲思親圖

山人愛雲不離山。巢居只在雲松間。枕泉漱石弄明月。此心真與雲俱閒。達官愛雲雲作侶。平步青雲稱高舉。天瓢一滴慰蒼生。大旱用汝爲霖雨。王公出處與此二者殊。十年遊宦感離居。衣上猶存慈母線。手中長把嚴君書。日日看雲不遑暇。爲有吾親舍其下。恨身不得逐雲飛。卻寫飛雲入圖畫。公餘展翫凝心神。見雲如見吾雙親。卷圖仍寄吾親舍。永奉高堂長壽身。狄公盛事王公繼。今古孝思同一致。

紫芝山房

四明胡處士夢紫芝生於別墅因置墓廬

先翁胷中有丘壑。預築園亭向山郭。清宵忽夢紫芝生。地靈獻瑞眞佳城。只今諸孫仍肯構。風姿睡睡如芝秀。一門朱紫自此升。始知吉夢爲休徵。始知吉夢爲休徵。千載無慙下馬陵。

五言律詩

題宋貢士袁庸死節傳後四明人

始獲鄉闈薦。俄驚國祚傾。丹心回日馭。赤手抗天兵。自可敦衰薄。何煩校死生。文山嘉傳在。端合附高名。

送定海許縣丞代作

蛟門佐邑滿。南去候庭闈。雨露隨花綬。雲霞避綵衣。賢聲今已著。色養舊無違。萬里滄溟月。清秋作伴歸。

送鄞縣鮑秀才作代

貧病吾何有。深慚鮑叔知。可堪遲暮日。翻值別離時。霜月栖烏府。風雲浴鳳池。壯遊如得意。音問莫教遲。

題葉處士湖山獨步圖

杖屨湖山外。悠然與世違。水邊延月上。巖際待雲歸。隨鹿過樵徑。看鷗到釣磯。只今瞻畫像。猶想挹清輝。

慈谿歸隱爲馮子木大尹賦

舊隱慈谿上。歸休足自怡。水翻琴上曲。山送畫中詩。叢菊秋容澹。孤松畫景遲。依然對猿鶴。無愧北山移。

題四明倪仲權處士小像

松間新雨過。清覽出亭皋。雲逐青驄馬。風生白苧袍。幽懷隨地遠。詩興與秋高。囊錦歸時重。應知從者勞。

介石齋爲四明倪克介賦

介石存中正。能爲逸豫防。礪金緣最勁。攻玉豈徒剛。貞德南山配。神機北斗當。補天應有待。五色爛文章。

篤軒爲定海胡處士賦

種竹繞前楹。年深勁節成。薄雲通雨氣。清夜動秋聲。魚豕空遺簡。鸞鳳合度笙。往來三徑熟。不負歲寒盟。

漁村書隱

彼美藏修者。爲漁住海鄉。傍沙觀鳥迹。臨水嘆螢光。舟楫須經濟。絲綸擬對揚。得魚供色養。綵服日升堂。

靜樂齋爲寧都鄧處士賦

寂寂幽棲地。無營足自怡。清泉流道脈。白月淨詩脾。每到忘機處。翻爲得意時。豁然成猛省。太極是吾師。

勉濟國諸郎

濟國諸公子。風標各擅場。青陽生玉氣。白月隱珠光。闕闕家聲重。詩書世澤長。直須同素志。早爲繼遺芳。

輓四明樂仲本先生被誣冤
死京獄

斯人嗟已矣。吾道轉銷沉。文物超前古。功名困至今。空山方泣玉。同舍忽誣金。白首號天處。飛霜六月深。昔訪幽棲地。論文十日還。圖書花竹裏。窗戶水雲間。一別成千載。孤魂隔萬山。裹雞吾老矣。東望涕長潸。

輓繆將軍

大將捐公館。哀音徹帝廷。殞星芒角赤。馭日簡編青。禮賻膺天眷。佳城獲地靈。唯餘馮異樹。寂寞倚園亭。

武昌南湖度夏

南浦幽棲地。當門罨畫開。青山入雲去。白雨度湖來。石潤生龍氣。川光媚蚌胎。芙蕖三百頃。何處看炎埃。

題奚仲英進士鵠山書堂

已爲蟾闕彥。仍就鵠山居。綵服晨供饌。青藜夜照書。寒香三徑小。清籟四窗虛。仕學俱優日。承明別有廬。

送章彥端赴夔府太守

春雪徧林皋。清寒襲繡袍。題詩送賢守。呵凍強揮毫。別思巴江永。才名蜀嶺高。文翁嘉政在。化俗莫辭勞。

送儒士柏堅赴會試

天子興文治。春官策譽髦。魚龍爭變化。麟鳳並遊遨。玉殿紅雲合。金門紫氣高。臚傳稱第一。宮柳暎恩袍。

五言排律

靜樂詩并序

靜樂者。章貢處士鄧翁之齋號也。翁已仙去。其子尙忠尙信。不忍死其親。猶求士人詩文以詠其潛德。予重二子之事死如事生也。製五言排律十韻寄之。以慰其孝思云。

高人嗟逝矣。靜樂尙求詩。豈意無爲道。翻成罔極悲。二難勤繼述。一默赴希夷。飲水心逾潔。看山意更遲。傷烏營冢日。弔鶴造廬時。霜露增新感。煙霞遂宿期。閉門春事去。隱几午陰移。未墜青雲志。仍工白雪詞。每憐司馬病。深忝叔牙知。慚愧無佳句。緘題慰孝思。

七言律詩

梅南老人讀易圖爲四明陸都事賦

晝省歸來謝縉紳。傍梅觀易最清真。孤根下應先天氣。太極中含大地春。傲睨乾坤雙老眼。婆娑香影一吟身。歲寒莫問調羹事。且作蒼英會裏人。

題甬東故處士盛子暘方寸室以遺其子繼學

道義謀生本自然。何煩負郭更求田。由來方寸留耕地。卽是虛靈不昧天。春雨旣濡先澤遠。秋風肯穫後昆賢。不忘種德辛勤意。餘慶朝朝大有年。

題故憲史徐子仁兄弟南湖漁隱遺卷

冰蘖同聲想二難。南湖寄傲水雲寬。並投清憲飛霜簡。對把滄浪釣月竿。蟻夢無憑應易斷。鷗盟有待竟長寒。卷中名勝多親舊。三復遺文一永歎。

瑞萱堂爲慈谿孫原道兄弟賦

手種叢萱孝感深。陽和隨見破窮陰。侵凌雪色雙華萼。報答春輝寸草心。疏翠近分書帶碧。嫵黃遙映壽觴金。忘憂坐對高堂晚。更聽熏篿奏好音。

題四明董氏知歸庵

袞袞紅塵未息機。斯人何事獨知歸。青山不辨將來計。白髮徒嗟既往非。谷口雲霞隨葛屨。沙頭魚鳥識荷衣。自慙潦倒江湖表。猶對旄丘賦式微。

題九曲山房圖

夏母墓廬也。

九曲園亭結構牢。畫圖誰爲重揮毫。蛟蚪起陸巖巒秀。風雨號空樹木高。五夜神光通嶽氣。三秋明月薦谿毛。瀧岡墓表情何極。手把柸圈淚滿袍。

樊口隱居爲武昌李君玉賦

萬里雲霄斂翼回。挂冠高臥大江隈。春深門巷先生柳。雪後園林處士梅。翠擁樊山邀杖屨。綠浮漢水映樽罍。誰能領取坡仙鶴。月下吹簫共往來。

巽江草堂爲章貢鄧尙忠賦

巽山環拱巽波涵。瀟洒茅堂在蔚藍。明月倒懸天上下。清風遠播地東南。尋盟鷗鷺閒情適。坐鎮魚龍老氣酣。最愛行藏兼吏隱。詩成應擬百花潭。

戲贈劉雲翁

千金不惜買新聲。贏得風流老更成。銀盞葡萄浮臘蟻。金屏窈窕嚇春鶯。香凝寢寢頻開席。花暗閒房合度笙。夜燕未終賓客醉。莫將明燭照華纓。

戲贈應修吉

硯谿居士神仙侶。短髮蕭蕭雪滿簪。煖老恨無燕趙玉。養生賴有坎離金。牀頭酒熟留僧飲。席上詩成對客吟。歲晚山空誰是伴。北窗梅月最知心。

題長江萬里圖

右逾越嶂左蓬壺。萬里提封入壯圖。斷石屯雲山擁蜀。驚濤雪立海吞吳。蟠桃有實來青鳥。若木無枝駐赤烏。秦漢經營人盡去。獨留形勝在寰區。按明刻屯雲二字乙轉

錢塘懷古

錢塘佳麗冠南州。故國繁華逐水流。龍虎已消王霸氣。江山空鎖古今愁。吳臣廟冷潮喧夜。宋主陵荒塋倚秋。最是西湖歌舞地。數聲漁笛散鳧鷗。

重到西湖

湧金風月昔追歡。一旦狂歌變永歎。錦繡湖山兵氣合。金銀樓閣劫灰寒。雪晴林墅梅何在。霜冷蘇隄柳自殘。欲買畫船尋舊約。荒煙野水浩漫漫。

題簡翁水光林影圖

知是平泉是輞川。水光林影共悠然。薜蘿涼暎紛紛月。蘋藻清涵湛湛天。微颭翠旗龍夭矯。倒開金鏡鳳翩翩。此中真趣誰能辨。吏隱雲間一散仙。

水光山色齋爲張勉夫賦

勉夫前朝搢紳也。

新搆茅齋絕世紛。水光山色喜平分。四窗涼湧玻璃月。一榻晴封紫翠雲。鳥度畫屏迷遠黛。魚吹清鏡動圓紋。往來半是漁樵侶。閒話興亡坐夕曛。

假館武當宮承舒庵贈詩次韵奉謝二首

一歸琳館卽逍遙。無復驅馳混市囂。載酒每承文士過。鬪茶頻赴羽人邀。三清風露從天下。五色雲霞匝地飄。匡坐不眠神益王。靜聽笙鶴度中宵。

去天尺五去人遙。地位清高隔世囂。祕閣校書多考索。初筵設醴重招邀。毋看賦雪才無敵。便覺凌雲氣欲飄。枉騎敢煩臨暑夕。擊舟或可候寒宵。公約來就宿時六月也。

次由翁中秋詩韵

西風黃鶴舊磯頭。皓月中分如夕秋。烏鵲無依頻繞樹。魚龍有喜競乘流。煙雲盡捲天逾大。河漢低垂地欲浮。擬買桂花陪勝賞。老來佳句恐難酬。

再用前韵

次年中秋翁在史館僕留鄂清悠然興懷復用前韵以寄。

庾公樓上鄂城頭。乘月今爲第幾秋。大地長天俱並照。明河晦海各分流。寒光下瀉方諸溢。顯氣高騰沆瀣浮。不見故人吳季子。百年清興若爲酬。

送奉祠康仲謙致仕還陝西

大國祠官致仕歸。秋風祖帳足光輝。青松黃菊先廬在。白髮蒼顏故老稀。久奉山川諸祀典。遠迎鄉黨識朝衣。家居重念君恩厚。目送南來一鴈飛。

送貝惟學武昌省親復還吳淞

黃鶴磯頭捲雪濤。孝廉舟穩載時髦。故廬先壟歸心切。慈母難兄別思勞。千里菴羹宜具饌。三秋菊酒稱題糕。到家正及登高會。瀟洒誰同白苧袍。

送人使高麗

文物中朝宰相家。聯芳五桂至今誇。百年重喜孫枝盛。萬里遙瞻使節華。陽谷宵分賓日馭。天河秋早候星槎。朝鮮自昔知才辯。伫見勳名被邇遐。

秋素軒爲涂以諒賦

新涼夜透讀書帷。瀟洒軒居素景宜。黃菊有香風瑟瑟。白蓮無質月遲遲。垂綸水檻沙鷗狎。步履柴門野鶴隨。除卻天光與雲影。更無一物在襟期。

次韵陸伯陽梅花詩

小車厭看洛陽花。夢想林逋處士家。十里湖山春淺淡。一枝雪月夜橫斜。孤高不受金尊賞。清冷無煩錦帳遮。今日重吟香影裏。百年風致未爲賒。

輓衛知事胡公鼎二首

江海論交四十年。故家文物羨君賢。燈前夜雨書連屋。花下春風酒滿船。舍瑟肯居曾點後。著鞭寧讓祖生先。他鄉重會清歡極。俄送輜車一泫然。

自構幽軒倚碧梧。琴樽時復集名儒。一官迢遞來黃鶴。五夜悲涼夢白駒。盛有良籌遺細柳。可無高義致生芻。孤兒扶柩歸程遠。啼殺林間返哺烏。

輓故豫章義士吳復原

挺生英傑百夫防。高義孤忠少頡頏。艱食屢分圖共濟。危城百戰誓同亡。延津劍去秋無氣。合浦珠還夜有光。三復園亭新墓表。哀榮寧獨在瀧岡。

輓吳公佑祭酒母劉夫人二首

淑容玉潤氣冰清。擇對仍歸閭世英。四德遠從麟趾化。九苞親見鳳毛成。正當愛日調珍鼎。遽爾乘雲上玉京。回首僂蹤無覓處。雙峯雨露倍傷情。

母儀婦道重當今。其說夫人獨苦心。教子遂成雙白璧。救夫不惜萬黃金。家庭遺愛留名郡。父嘗爲興國監郡。表新銘出翰林。每遇良辰增孝感。板輿閒卻在花陰。

題吳公祐祭酒雙峯雨露亭

春到先莖雨露饒。思亭新構報劬勞。碧涵一水吞天闕。玉立雙峯拔地高。每想音容增怵惕。還因精氣感熏膏。通家三世深恩在。把筆題詩淚滿袍。

輓謝伯昇母王安人

蘭蕙爲心玉作姿。閨門彝範後人師。齊眉致敬過賓禮。和膽資勤冠母儀。歲晚靈椿聯奕葉。春深文梓長孫枝。正常琴瑟偕娛老。豈意栢椿感孝思。

武餘清樂爲致仕尹將軍賦

汗馬功成卽引年。登山臨水小遊仙。印紋久祕徵生綠。字韻新成盡入玄。深造煙霞靈運屐。嘯歌風月鄂君船。貽謀尙有孫吳略。膝下時時課一篇。

紫閣山房爲史仲魚賦

太華諸峯紫閣奇。結茅應不負幽期。遠分空翠來函谷。靜寫脩蛾入漢岐。紅日屋頭臨照近。白雲窗外卷舒遲。曳裾自到金門下。猿鶴無時惱夢思。

送長史管公時敏朝京

黃鶴樓前畫舫開。送車千輛動浮埃。楚人獨數蘇從諫。齊士誰過管仲才。報政每隨鷁鷺入。覽輝重見鳳凰來。君心江漢同東注。一一敷陳對玉臺。

次向士誠韵士誠爲予築行寓于寓舍以詩見意次韵奉謝云

道究先天太乙初。金門大隱復誰如。已承丹篆三天錄。還讀青藜午夜書。華衣忽歸遼海鶴。仙庖頻食武昌魚。行窩處處春風裏。擬辦堯夫洛下車。

得亡友郭至善醫士哀問

不知大夢赴華胥。猶向來人問起居。藥圃春深餘故植。芸窗日永列遺書。猶憐宿草迷荒冢。安得生芻致倚廬。咫尺無由親執紼。深慚千里巨卿車。俊骨英才孰與儔。華星明月照清秋。重傷買誼年猶少。深慟顏淵德最優。過墓自當留寶劍。濟河誰復共仙舟。極知修短俱天命。老淚無端似水流。

寄題□□黃子中橋亭八景

橋亭風景洞天如。中有儒仙舊隱廬。春漲接藍涵蟪蛄。澧陂春漲。內有石梁長橋。曉嵐滴翠溼芙蓉。龍磯朝嵐。內有長山峻嶺。受詩華巘浮丘館。中華翠巘峰頭。有浮丘伯仙字。說劍香鑪許令居。香爐紫煙峯頭。有許旌陽仙居。雲外懸崖飛屐上。懸崖。天寶。雨中沃壤帶經鋤。田東。暮雨。疏鑿鯨吼霜華重。聖容。僧鐘。長笛龍吟月色虛。仙笛。老我塵寰懷勝境。追遊早晚命巾車。

五言絕句

題赤壁圖

橫槩英聲遠。聞簫逸興長。至今風月夜。鶴夢繞黃岡。

題謝安觀山圖

欲爲蒼生起。神州未可還。籌思保江表。安若會稽山。

長谿獨釣圖爲舒庵賦

谿上釣秋風。心隨谿水東。後車今已載。何待兆非熊。

題鄭高士畫竹

鄭君高節士。瀟灑絕人羣。獨把青鸞尾。山窗掃白雲。

梅竹畫爲郭志善題

姑射下天壇。天空鬢影寒。雪深歸路迴。獨自跨青鸞。

題由翁先生梅蘭二首

老向江南住。梅花共歲寒。故人清興在。踏雪幾回看。

湘皋風日美。芳草不勝春。欲采紉爲佩。慚非楚蓋臣。

畫菜爲馬上舍題

蔬畦新雨過。小摘稱居貧。若入君王夢。瓊林第一人。

畫菘菜

老圃青青甲。平生味飽諳。本無食肉相。豈是厭肥甘。

畫蘿菊

高氏賢兄弟常將備夕餐。如何清烈士今作畫圖看。

畫竹

拂素寫晴窗。亭亭玉一雙。蒼龍雷喚醒。風雨徧湘江。

畫枯木竹石

青天騰一蛟。白石臥雙虎。何人歌竹枝。遙隔瀟湘浦。

題畫二首

遠水吞天碧。危峰拔地青。何由雲樹底。揮塵坐茅亭。
翠黛浮晴漢。虬枝立暝煙。回舟不用楫。江上水吞天。

靜樂詩爲脩江向士誠賦

清心如山水。一月印當中。誰道芭蕉雨。瀟瀟解惱公。

七言絕句

庭按元本空行。今補此四字。

題畫

九疊雲峯面面同。穀紋波起鯉魚風。谿頭艇子林間屋。來往能無避俗翁。

題會稽王冕翁畫梅

永和筆陣在山陰。家法惟君悟最深。寫得梅花兼二妙。右軍風致廣平心。

紅梅

姑射仙人煉玉砂。丹光晴貫洞中霞。無端半夜東風起。吹作江南第一花。

紅梅翠竹

瓊仙服盡紫金丹。不識人間有歲寒。一笑荒村春似海。滿天風雪跨青鸞。

水仙二首

湘雲冉冉月依依。翠袖霓裳作隊歸。怪底香風吹不斷。水晶宮裏宴江妃。
影娥池上晚涼多。羅襪生塵水不波。一夜碧雲凝作夢。醒來無奈月明何。

竹枝詞二首

竹雞啼處一聲聲。山雨來時郎欲行。蜀天恰似離人眼。十日都無一日晴。
水上摘蓮青的的。泥中采藕白纖纖。卻笑同根不同味。蓮心清苦藕芽甜。

題定海樂節婦劉氏沿江泣尋夫屍卷

怨入江雲結畫陰。潮痕清淺淚痕深。白頭重見黃泉水。方盡寒燈一寸心。

題淞江梧桐鄉鳴鳳里朱節婦卷

手植梧桐不憚勞。朝陽鳴鳳一來遨。花棲未穩翻然逝。慰眼惟遺五色毛。

重到戴玄學齋居

憶坐詩壇棹酒船。花枝旖旎月嬋娟。一從鳧鳥朝天去。月夕花朝兩惘然。

題竹間翁白馬圖

誰識驂騑汗血中。靜圍積雪動生風。一從選入天閑內。不覺人間萬馬空。

題唐申王三駿圖

三駿英英出渾洼。太平芻粟飽天家。誰知大將平河北。百戰功歸獅子花。

戲題明皇照夜白圖

天上麒麟天下稀。月中幾送八姨歸。君王寓目應追悔。誤看乘鸞度羽衣。

題劉伯昇所藏蘭亭

右軍高致極清真。盛築蘭亭詠暮春。文彩風流那復見。摩挲遺墨想丰神。

題水竹居卷

夜夢青鸞浴鳳池。曉來水竹索題詩。浣花吏隱無人繼。老我風塵寫愧辭。

武昌南湖度夏

湖山新雨洗炎埃。萬朵青蓮鏡裏開。日暮菱歌動南浦。女郎雙漿盪舟來。

紅蓮白藕詞

紅蓮白藕兩相宜。欲採臨流意轉遲。蓮子總甜心獨苦。藕芽雖美腹多絲。
探蓮採藕湖水溥。阿儂踏歌郎賞音。多虛少實如郎意。外甜內苦似儂心。
送蔡用嚴還四明

四明故舊苦無多。死別生離奈若何。老淚暗添江漢水。隨人去作海東波。
迢遙海國接江鄉。一度懷人一斷腸。正值西風搖落際。可堪重送蔡中郎。
寄四明諸友

海上歸期苦恨遲。歸心日與海爭馳。故人有待吾衰矣。一寸寒灰萬縷絲。
寄武昌嚴靜山

出門便有好湖山。對酒當歌莫暫閒。不請自來留卻去。無情白髮與朱顏。
次舒庵見訪韻

退食從容馬首東。夕陽斜暎柳營紅。埽門將帥遙相待。卻訝寒齋訪秃翁。
哭四明宋廷臣推官

甬東郭外爲鄰住。湖北城中值宦遊。直擬千回同一日。那知一到竟千秋。
擬按元本此處有通水竹居卷一首與本卷
廿三頁所載同惟浣字作流因係重出故刪

題詞

題丁鶴年集呈堯圃政得年字禁押本
時嘉慶乙未四月

顧廣圻稿

西域詩人集傳於至正年諸兄咸附錄高弟各分編時下哀思淚亦隨方外緣須知海巢序只說武昌前

次澗齋韻題元本丁鶴年集

堯圃黃丕烈艸

元代詩名盛涵濡近百年用戴序語流風傳絕域吟稿見遺編鶴年集以
此為最善廬墓全親孝居山謝世緣石田鴈門集美不擅於前叔能以伯庸天錫輩為比今余藏元人諸集如元刻之馬
石田舊鈔之藤雁門皆稱善本得此可云濟美故以為擬

次澗齋韻題堯圃新得元刻丁鶴年集

夏文濬艸

明代重刊本云題正統年名因文苑重傳入史臣編一過真空選用堯圃
跋語三長合有緣三長謂石田鴈門
集及此書也堯圃
有結翰墨綠圖
章綠字本此後來定居上祕笈勝從前堯圃云舊有明本藏諸笈久
矣曾取此手校知不如遠甚

右三益聯吟冊中題元本丁鶴年詩也此集為澗齋歲試玉峯時收而後以歸余者故仿校宋本建康實錄例澗齋為首唱而余次之方米最後者因余兩人唱和時方米挈徒小試玉峯歸後繼和故也限年字而禁用本事者亦冊中例也此書破損不堪觸手重付裝池并錄三詩于卷首以見題書紀事一時賓主之歡有如是也堯圃跋

再賦丁鶴年集一首得丁字仍
禁本事

廣圻稿

搜來從架下。首葉已殘零。我自一知己。人殊不識丁。收藏誠有數。呵護豈無靈。別具區區意。茲為隗始寧。
時葬圃命某買為玉峯續訪之役。

次澗齋韻

葬圃黃丕烈

重觀裝潢舊。旋風葉未零。圖章宜置甲。部次恰居丁。我願希千頃。君交託九靈。訪書情正切。寤寐想難寧。
時玉峯書舛傳聞有舊刻大戴禮。澗齋欲與余買舟往訪也。

同葬圃次韻

方米夏文燾

莫嗟相見晚。全帙未奇零。他日誇黃甲。二字借用葬圃將輯書目。元刻元人集例入甲等。今朝笑白丁。用澗齋詩。押丁字句意。受嗤遭目拙。
特賞愜心靈。得隴休重望。教君五藏寧。葬圃所續訪大戴禮。已探得是明板矣。中春月。余得宋刻千金方。同人相約題詩紀事。限孫字。而禁用真人本姓。自後因書而賦者。悉用是例矣。初澗齋得此書。重為元刻。詩以紀事。擬用丁字。畏其難。而改用年字。卷端三首。是也。昨澗齋自家至書塾。袖出一詩。謂向所為難者。今反見巧矣。所押丁字。果稱巧絕。遂借方米次和時。命工用也。是翁所用旋風葉裝潢法裝之。事既竣。即就副葉界烏絲闌書其上。披覽之餘。亦頗快目。書中哀思集。重第六葉。續集闕第八葉。重第十二葉。總計七十七葉。每葉邊楷書細字。筆墨亦古雅。澗齋謂是明人書。余亦絕愛之。故并及云。哀思當作方外。葬圃。

附錄

吉雅謨丁字元德至正間進士浙東元帥鶴年兄也

題浙東廉訪知事楊仲儒先生死節卷

危城經百戰。幕下得真儒。冰蘖存孤操。風雲入壯圖。奇功方破敵。大節竟捐軀。凜凜餘生氣。千秋激懦夫。

題天童寺朝元閣

海內兵塵已千年。上方鐘鼓依然然。史臣錫號承天寵。中使函香出御筵。山列九龍蟠紫翠。樓開五鳳出雲煙。籃輿亦有登山約。擬聽松風借榻眠。

贈陳章甫

三十年前鬢未蒼。曾陪宰相入鷓行。解衣換酒尋常醉。躍馬看花取次忙。亂後已非前日夢。老來那復少年狂。黃冠野服新裝束。穩把長竿釣海鄉。

省秋過鶴年書館夜話

弟兄惟我老。宗族有君知。萬里常爲客。百年能幾時。秋清妨熟寐。夜靜話貞期。明日恩恩別。還生兩地思。

假日燕集呈席間諸老

半生辛苦獨天知。十載鄉關入夢思。作郡正逢多事日。揮毫不及少年時。青衫有淚多如雨。白髮無情亂

若絲今日一樽諸老共臨風不醉復何辭

詞曰...

...

...

...

...

...

...

...

...

...

...

...

詞錄

愛理沙字允中至正間進士翰林應奉鶴年兄也

題戴叔能先生九靈山房圖

山房乃先生讀書處也時先生避地四明故云

夢裏家山十載違。丹青咫尺是耶非。墨池新水春還滿。書閣浮雲晚更飛。張翰見機先引去。管寧避亂久忘歸。人生若解幽棲意。處處林丘有蕨薇。

題餘姚葉敬常州判海隄遺卷

潮汐東來勢蹴天。一隄橫捍萬家全。陵遷谷變人誰在。海宴河清事獨賢。曉日山川神禹迹。秋風禾黍有虞田。河渠他日書成績。應並宣房與代傳。

題東湖古鼎銘長老鍾秀閣

檻外澄湖平不流。窗間疊嶂屹將浮。煙霞五色錦屏曉。風月雙清瑤鏡秋。薜蘂濃香吹法席。芙蓉涼影蕩仙舟。結巢擬傍雲松住。回首朝簪愧未收。

樊川吳惟善鶴年表兄也

寄武昌諸友

黃鵠山前漢水濱。一時英俊總能文。金釵佐酒年俱少。銀燭鈔書夜每分。鴈杏魚沉勞遠思。狼貪羊很絕前聞。兵戈故國知誰在。目斷西南日暮雲。

寄東海鶴年

鶴臯東望接三山。海上羣仙日扣關。虎守月爐丹鍊就。龍吟霜匣劍飛還。故園松菊餘三徑。老屋煙霞恰半間。爲問林泉逃世者。如公今有幾人閑。

題扇寄友

拾得瀛洲月一輪。冰紈初翦瑩無塵。提攜不用深相憶。滿握清風卽故人。

小遊仙

桂殿瓊宮露氣清。吹簫者是董雙成。無端又作人間夢。風雨蕭蕭雞亂鳴。河漢無聲海月寒。長鯨吸浪洞庭乾。一聲鐵笛風雲動。人在危樓第幾欄。

跋

太學生戴習錄其師鶴年先生詩曰海巢集者請題其後。鶴年予友也。其詩忠義慷慨。有騷雅之遺意焉。昔唐之僧有讀其友盧仝之詩者曰。鯨吞海水盡。露出珊瑚枝。海神知貴不知價。留與人間光照夜。吾讀海巢集亦云。生其寶之。生其寶之。虎丘澹居老人至仁書。

三
四
五
六
七
八
九
十
十一
十二
十三
十四
十五
十六
十七
十八
十九
二十

一
二
三
四
五
六
七
八
九
十
十一
十二
十三
十四
十五
十六
十七
十八
十九
二十

後跋

此元刻元人丁鶴年詩。余友顧澗齋歲試玉峯時所收。而以之歸余者也。余向藏正統重刊本止三卷。今元本分四集。一曰海巢集。二曰哀思集。三曰方外集。四曰續集。以附錄終焉。嘗取與明刻校勘。分卷分體。俱非其舊。卽如海巢一詩。元刻在卷一。或以是名集。職是之故。明刻列諸卷二中。失其旨矣。他如哀思已下三卷。皆有取意。而後之稱者。僅據至仁一序。悉以海巢名之。有是理乎。得此可證廬山面目。益歎元本之不致淪沒者。幾希。爰付裝池。俾得附麗不壞。與元刻諸名公集。同十襲藏之。較嚮之塵埋故紙堆中。其顯晦爲何如耶。伯樂一過冀北之野。而馬羣遂空。此書之於澗齋。吾亦云然。嘉慶己未孟夏五日。書於士禮居。棘人黃丕烈。

卷端五言古詩採蓮曲第三首已下闕文。久無從補。迄今辛巳。時越二十三年矣。始見沈寶硯徵君。手錄殘本。依樣補之。昔義門何學士補宋刻後印本。許丁卯集。得毛豹孫影寫本。足之。謂非不知妄作。茲余之補今集。而得沈寫本。不猶守此義邪。喜而書此。道光紀元秋九月望日。復見心翁。坐雨縣橋之學耕堂。燒燭識。

丁鶴年集校譌

余幼學作試帖詩賦。北窗梅月最知心。題得二句云。無言宵弄笛。有約石眠琴。高丈鐵珊見而賞之。惜題句無出處。檢查佩文韻府。乃在摘句中。繼閱元詩選。知係鶴年句。余隨欲覓其專集。攷四庫全書。止有一卷。藝海珠塵收有三卷。浙江探遺書目亦然。惟愛日精廬有元刻四卷之本。訪諸虞山書友鮑芳谷。知售去久矣。閱六年。金順甫自山塘汪氏攜三卷之本歸余。爲明正統刊本。黃羹圃先生以元本校於上下方。余循次鈔之。無如次敘淆亂。批校模糊。正欲再覓善本。芳谷適得張氏影元鈔本贈余。與元刻惟妙惟肖。每半頁十行。行廿一字。因歎前則數年不獲。今且兩本並儲。文字因緣。若由前定也。急公之於世。其有明刻優於元刻者。不敢毅然更改。但於本詩下注云。按某字明刻作某。庶不失元刻真本云。咸豐三年五月。仁和胡珽識。

序 二頁五行

己字誤。元本作已。

一卷二頁九行

雷雷誤。元本作藹藹。十行。單字誤。元本作悲。

三頁八行

闕字誤。元本作缺。十行。不肯誤。元本作不。本不堪。

五頁十二行 修字誤。元本作脩。

六頁九行 霏字誤。元本作藹。

七頁一行 閑字。元本作閑。

九頁十三行 元本純綺富从明刻作執綺。

二卷十五頁三行 閑字。元本作閑。

十六頁十二行 窺字。元本作窺。

十七頁三行 軸字。元本作土。 十五行 閑字。元本作閑。

十八頁四行注 海濱。元本作濱。 五行 砥字。誤。元本作砥。

十九頁十四行 薪字。誤。元本作新。

二十一頁五行 晉字元 十一行 霽字元 十四行 芻字元
本作我 本作沾 本作藟

二十二頁七行 賡字誤
元本賡

二十三頁十行 諫字元
本作牒

二十五頁五行 敷字元
本作勅

三卷二十七頁十一行 大君元本明刻並 十四行 樓字元
同按當作天君 本作栖

二十八頁一行 覽字下上字上 七行 閒字元 八行 酒字元 十二行 釋字等
元本空一格 本作閑 本作灑 畫从此

二十九頁七行 孤竹誤元
本作孤燭

三十頁十行 僻字元
本作癖

三十一頁十四行 遊字元
本作游

三十二頁一行 浙水元本作漸水

三十四頁四行 寔窮誤元本作窮窮

三十六頁三行 開字元本作開

四卷三十九頁五行 庵字本元作菴第八行同此

四十一頁一行 層字元本作層 九行 費字筆畫从此 十一行 赴字元本作赴

四十二頁二行 上字元本作海

四十三頁十三行 作代誤元本作代

四十五頁二行 泣字元本作活今从明刻

四十七頁四行 庵字元本作菴 八行 蚪字元本明刻並作蚪今訂正

四十八頁四行 疊字元 本作脩 十一行 續字元 本作續 今从明刻改

四十九頁五行 據字元 本作據 六行 閒字元 本作閑 七行 庵字元 本作菴

五十頁八行 洒字元 本作灑

五十一頁十四行 夫字元 本作天 十五行 閒字元 本作閑

五十三頁一行 元本在詩後低 三格單行大字 十行 春漲句以下八句 每句提行頂格 其每句下空一格 注八景名八景下又作雙行 注內有石梁長橋等句 至老我句又提行頂格 今因詩集中從無此式 故从明刻

五十四頁三行 庵字元 本作菴 六行 洒字元 本作灑 十一行 勝字元 本作時 今从明刻 采字元 本作採

五十五頁四行 時字誤元 本作晴

五十六頁四行 紅梅翠竹元本在詩 後驚字下空四格

五十八頁九行 洒字誤元 本作酒 十行 庵字元 本作菴

附錄三頁二行 故云元本
上空三格

丁鶴年集續校 附補校

卷一四頁五行 天字筆
畫欠清。

卷二十七頁十四行 蛇當
作跬。

二十一頁三行 楚字誤
原作焚。

二十四頁十三行 驪當
作驪。

二十六頁三行 冷字誤
原作冷。

卷三二十八頁十三行 參當
作駘。 十四行 冷疑
作冷。

三十頁四行 勒字誤
原作勒。

三十六頁九行 孝當
當老。

卷四四十頁十行

又當作父。

五十三頁一行注

意疑當二行衣當作表。

五十五頁八行

塵當作塵。

五十八頁十三行

到疑作別。

跋

五行 僧至仁在元明間嘗住吾越。宋景濂稱其文有四漢風。見西齋淨土詩附錄此跋云澹居老人當即其人也。

附補校

題詞二頁五行注

據字有誤。疑當作肆。

序 二頁四行

若干當作若干。


卷一三頁八行

州當作洲。

卷三二十七頁十四行 樓字見校譌
應加○今脫

卷四五十六頁四行 紅梅翠竹見校
譌應加○今脫

附錄一頁七行 千年誤原
作十年



丁孝子傳

四明烏斯道撰

丁孝子名鶴年。字鶴年。西域人。性狷介。窮經博史。尤工於詩。自其祖阿老丁公入中夏。世爲顯官。父職馬祿。丁官武昌縣最長。有善政。歿而就葬武昌。後兵亂。鶴年倉卒奉母夫人走南徐。世父家。生母馮先避匿邑之東村。東村首難。竟阻絕。莫知之也。餘十載。母夫人歿。鶴年又避地明之定海。聞父墓嘗爲盜發掘。生母亦病死。葬洪道鄉。俱不得往省視。日夕憂悸。且卻絕酒肉鹽酪。示自貶。又二十載。道旣通。卽告牒還武昌。至則別竄地樊山。窆父棺。卜日襄事。日已迫。而淋雨十日不止。鶴年先一夕仰天悲泣。拜雨中。愿翌日雨止。半日許終事。埃至質明。密雲雖四塞。雨則強不澍也。及發引。視窆而返。雨傾瀉如故。已而訪生母葬地。村聚自兵。不省何所。自秋徂冬。徧訊之。終莫有知者。鶴年無以措意。惟作母主。蚤莫拜前。祈五旬。浹有報。拜至七日。夜夢母氏出高堂中。鶴年遽牽衣慟哭。以慟而卽寤。晨起。鄰老有楊重者。至云。吾昨夢子之母氏。堂宇間自內出。以酒肉見賜三人。內一人勿御也。鶴年以夢母氏與鄰老同。夢之夕。又同。所夢母氏堂宇在舊所。居廢宅之西。又同。斯見母氏葬地。朕兆也。試卽其地。與萊荒土物色之。因具畚鍤。偕往徘徊顧視。見平陸土有陷下者。鶴年意謂吾聞母葬時。無棺槨。下輦土輒上。覆舟板。人與板朽腐盡。乃爾。茲殆可啓而觀歟。遂陳酒肉以祭。祭畢。斲其土骨。果見板尙有松節。土輒亦具在。良是矣。然恐他墓偶有同者。復嚙血骨上以試。良久。拭去。血骨通變茜色。可驗。母一齒當正中。如漆。視之益驗。時四人享祭餘。

鶴年不入口。又與鄰老無少爽。乃收骨棺斂葬。是鄉慈母王墓。在寒溪塘。併加封樹。鶴年就廬於父墓。將終其身。

論曰。子盡禮於父母。固人所當爾。至感夫高遠幽冥而驗焉者。非精誠之心。涉至難而罔渝者。弗能也。予考史冊。方多古少。今孰意鶴年桀然處頑薄之中。爲人之所獨也。彼高遠幽冥。且足以感之。又豈不能感諸人乎。嗚呼。何其偉哉。

詩曰。丁鶴年精誠之心。上達九天。丁鶴年精誠之心。下達九泉。先翁會長武昌縣。死葬山中。厄兵變。山中父老懷甘棠。修築堂封自相勸。鶴年避亂東海頭。年深道阻生煩憂。亂靖還尋武昌路。淚痕滴滴先翁丘。彷徨改葬樊山側。不惜黃金換沙石。此身尙在天地間。何事能令慰朝夕。卜日已定雨漫漫。十日不止難下棺。仰首呼天雨中拜。雨爲閣住陰雲端。葬後倉皇下山去。大雨依然大如注。是時送葬紛如雲。祭奠爭趨墓邊路。母困于戈生別離。兒大母死才得歸。但聞母死葬村落。問人葬地俱不知。村落蓬蒿暗荒土。數月走尋心獨苦。焚香祝母如有靈。爲報沈淪在何許。夢中忽見別時容。步上高堂言未終。牽衣慟哭自驚覺。清晨起接鄰家翁。翁言昨夜夢而母。親出房櫺贈尊酒。夢聞此夕精靈通。蚤晚應當見枯朽。共披荆棘凌風霜。平地有坎疑有藏。酒飯陳辭屬深土。遺骸果見生輝光。恐認他人心。斃甌。嚙血淋漓試枯骨。枯骨通紅知可徵。一齒當門正如漆。重製衣冠新作墳。遷葬母骨安母魂。積恨誰知滿胸臆。烈風頓掃空中雲。丁鶴年病且瘳。何異常人七尺軀。丁鶴年能讀書。何人不解探玄珠。一片精誠獨如此。回首世人空有子。

